



TV DUKAGJINI
Ermal PANDURI
Drejtor
Pejë

Rasti Nr. 2017/221
Ref:1712/1367/KPM/am

VENDIM

Lidhur me Rastin Nr. 2017/221 – Komisioni i Pavarur i Mediave (KPM) për TV DUKAGJINI (“Pala Përgjegjëse”)

Faktet

1. Pala Përgjegjëse është pajisur më Licencë të KPM-së me datën 28 gusht 2009. Pranimi dhe nënshkrimi i Licencës obligon të Licencuarin që të veprojë në përputhje me Ligjin e KPM-së dhe me të gjitha aktet tjera përkatëse ligjore.
2. Në bazë të Kreut VIII të Ligjit për Zgjedhjet e Përgjithshme në Republikën e Kosovës Nr. 03/L-073, KPM është përgjegjëse për mbikëqyrjen e zbatimit të rregullave përmes të cilave përcaktohet sjellja e mediave gjatë fushatës zgjedhore dhe heshtjes zgjedhore.
3. KPM duke u bazuar në kapitullin e VIII të Ligjit për Zgjedhjet e Përgjithshme Nr. 03/L-073 ka nxjerrë udhëzuesin për të ndihmuar të licencuarit që të veprojnë në pajtim me Kreun VIII të Ligjit për Zgjedhje. Udhëzuesi i KPM-së me datën 10 nëntor 2017 i është dërguar Palës Përgjegjëse me qëllim që t'i ofrohen udhëzime për respektimin e dispozitave ligjore gjatë mbulimit të fushatës zgjedhore dhe heshtjes zgjedhore gjatë Balotazhit në Zgjedhjet Lokale në Republikën e Kosovës.
4. KPM ka bërë monitorimin e programit të Palës Përgjegjëse, gjatë fushatës zgjedhore dhe heshtjes zgjedhore për zgjedhjet e Balotazhit, me qëllim të vlerësimit pajtueshmërisë së Palës Përgjegjëse me Kreun VIII të Ligjit për Zgjedhjet Nr. 03/L-073.
5. Bazuar në raportin e monitorimit të datës 18 nëntor 2017, KPM ka gjetur se Pala Përgjegjëse gjatë heshtjes zgjedhore, me datën 18 nëntor 2017, ka transmetuar për disa sekonda një spot politik të VV (Shpend Ahmeti) dhe një spot politik të AAK-së (Gani Dreshaj).
6. KPM, në bazë të të gjeturave të monitorimit, me datën 18 nëntor 2017 i ka dërguar Njoftim për Shkelje Palës Përgjegjëse, duke e njoftuar për shkeljet e bëra dhe duke i kërkuar të përgjigjet me shkrim menjëherë pas pranimit të Njoftimit.
7. KPM menjëherë ka pranuar përgjigje nga Pala Përgjegjëse pas Njoftimit për shkelje në të cilën theksohet se ka qenë lëshim teknik që u është përvjedhur stafit teknik brenda bllokut të

marketingut dhe se janë të përkushtuar që të respektojnë me përpikëri secilën rregullore dhe dispozitë.

8. Pala Përgjegjëse për gjatë mbulimit të fushatës zgjedhore në Zgjedhjet e Përgjithshme dhe raundit të parë të Zgjedhjeve Lokale të vitit 2017 është sanksionuar nga KPM-ja për shkak të shkeljes së rregullave të përcaktuara me Kreun VIII të Ligjit për Zgjedhje (transmetim të spoteve politike më të gjatë se dy minuta, neni 49.1) dhe Kodit të Etikës KKPM-2016/03 (transmetimi i spoteve politike me prezencë të fëmijëve, neni 9).

Analiza Ligjore

9. Komisioni bazuar në të gjitha faktet dhe analizat e lartpërmendura konstaton Pala Përgjegjëse gjatë heshtjes zgjedhore, më 18 nëntor 2017, për Balotazh të Zgjedhjeve Lokale në Republikën e Kosovës ka transmetuar për disa sekonda spote politike, duke vepruar në kundërshtim me nenin 52, paragrafi 1, të Ligjit për Zgjedhjet Nr. 03/L-073, i cili përcakton se:

“Asnjë person ose medium nuk transmeton ose publikon çfarëdo materiali që i takon aktivitetit të fushatës gjatë periudhës që fillon njëzetekatër (24) orë para hapjes së vendotimeve deri në mbylljen zyrtare të vendotimeve.”


10. Komisioni konstaton se Pala Përgjegjëse edhe pas Vendimeve të Komisionit të KPM-së Ref:1708/780/KPM/am dhe Ref:1711/1277/KPM/am ka dështuar që të marrë hapa të nevojshëm për të vepruar në pajtueshmëri me Ligjin për Zgjedhjet e Përgjithshme Nr. 03/L-073 gjatë mbulimit të fushatës zgjedhore.
11. Komisioni duke u bazuar në faktet e lartpërmendura konstaton se Pala Përgjegjëse në mënyrë të vazhdueshme ka vepruar në kundërshtim me Ligjin Nr. 03/L-073 për Zgjedhjet e Përgjithshme.

Vendimi

12. Komisioni bazuar në nenin 30, paragrafi 1.3, të Ligjit të KPM-së sanksionon Palën Përgjegjëse me gjobë në vlerën prej 1,000 (njëmijë) euro për shkelje të nenit 52, paragrafi 1, të Ligjit për Zgjedhjet e Përgjithshme Nr. 03/L-073.

E drejta për Ankesë

13. Ankesat i parashtrihen Bordit për Ankesa brenda tridhjetë (30) ditësh nga pranimi i vendimit të KPM-së në pajtim me nenin 29, paragrafi 5, të Ligjit të KPM-së. Ankesa bëhet me shkrim dhe duhet të përcillet me dokumente ose dëshmi që mund të kërkohen nga Bordi i Ankesave në pajtim me nenin 42, paragrafi 2, të Ligjit të KPM-së.
14. Bordi për Ankesa do t'i merr parasysh vetëm ankesat e bazuara në informacione ligjërish të relevante të cilat nuk ishin të disponueshme në kohën e marrjes së vendimit të KPM-së, apo të bazuara në mundësi se ekzistonte gabim procedural dhe material i bërë nga ana e KPM-së gjatë marrjes së vendimit.


Adnan MEROVCI
Kryetar



05.12.2017
Datë